

U ovom broju, između ostalog, čitajte:

- Na inicijativu UPFBiH izmjenjena Odluka o propisivanju mjera neposredne kontrole cijena
- Po hitnom postupku usvojen Prijedlog zakona o stečaju uprkos upozorenjima UPFBiH da predloženi tekst neće riješiti probleme u ovoj oblasti
- Na inicijativu UPFBiH, Vlada FBiH usvojila naredbu kojom se dozvoljava prisustvo većeg broja osoba u trgovinama
- UPFBiH traži hitnu kontrolu zakonitost isplate naknada uposlenicima javne uprave
- Poslodavci sa rezidentnim predstavnikom MMF-a o efektima pandemije na privredu
- Otvoreno pismo Tegeltiji i Bevandi: Hitno pokrenite procedure za potpisivanje bilateralnih sporazuma o povratu PDV-a
- Na inicijativu UPKS u KS članarine Turističkoj zajednici smanjene za 50 posto za kalendarsku 2021. godinu
- Prijedlog mjera za pomoć privrednim subjektima i obrtnicima u KS



Trgovci, veletrgovci i proizvođači neće provoditi Odluku Vlade FBiH o ograničenju marži

UPFBiH smatra Odluku o propisivanju mjere neposredne kontrole cijena za pojedine osnovne životne namirnice neustavnom, nezakonitom i neprovedivom sa nesagledivim štetnim posljedicama

U Udruženju poslodavaca Federacije Bosne i Hercegovine smatraju Odluku o propisivanju mjere neposredne kontrole cijena za pojedine osnovne životne namirnice i druge proizvode utvrđivanjem maksimalne marže koju je donijela Vlada Federacije BiH, neustavnom, nezakonitom i neprovedivom sa nesagledivim štetnim posljedicama.

Iz Udruženja traže hitno povlačenje ove Odluke i upozoravaju na pogubne posljedice do kojih bi provođenje Odluke dovelo ne samo u oblasti trgovine, nego i distribucije, ali i proizvodnje, naročito kod domaćih proizvođača hrane.

Na sastanku koji je organiziralo UPFBiH, a kojem su prisustvovali predstavnici trgovaca, veletrgovaca i proizvođača, jednoglasno je zaključeno da se Odluka Vlade FBiH neće provoditi i da će se pokrenuti sudski postupci u cilju poništavanja Odluke, ali i protiv osoba u Vladi FBiH odgovornih za njeno donošenje.

Donesena Odluka neće biti provedena u znak poštovanja prema kupcima, jer bi njeno provođenje nesumnjivo dovelo do nestašice značajnog broja artikala u trgovačkim radnjama, gašenja značajnog broja radnih mjesta, zatvaranja trgovačkih radnji, a imalo bi negativan uticaj i na BDP te značajan pad priliva sredstava po osnovu uplate PDV-a.

Dodatno se ističe da je pomenuta Odluka neustavna i nezakonita, jer nisu ispoštovane važeće

zakonske odredbe. Naime, prema članu 4. Zakona o kontroli cijena Vlada Federacije BiH može poduzeti mjere neposredne kontrole cijena no prije toga potrebno je poduzeti korake i mjere ekonomske politike. Nadležni organi u vršenju kontrole cijena, svaki iz svoje nadležnosti, prije donošenja ove Odluke su shodno članu 3. Zakona o kontroli cijena morali poduzeti mjere ekonomske politike kojima se utiče na odnos ponude i potražnje, utvrditi zaštitne cijene (garantirane i minimalno – otkupne) pojedinih poljoprivrednih proizvoda u skladu sa aktima Parlamenta FBiH.



U članu 6. istog zakona jasno je navedeno da se mjere propisuju izuzetno, ako i pored poduzetih mjera ekonomske politike, nastupe ili mogu nastupiti veći poremećaji na tržištu i u kretanju cijena. Vlada FBiH nije poduzela niti jednu od propisanih mjera ekonomske politike.

Također je važno istaknuti da rast cijena na tržištu nije rezultat povećanja trgovačkih marži već isključivo rasta cijena sirovina globalno, uslovljeno trenutnim okolnostima, a što za rezultat ima povećanje nabavne vrijednosti proizvoda. Pa je tako cijena tone pšenice prije pandemije iznosila od 150 do 170 eura, dok je danas cijena značajno veća te iznosi od 220 do 240 eura po toni.

Iz Udruženja poslodavaca zahtijevaju hitan sastanak sa premijerom FBiH i resornim ministrom kako bi se pronašlo rješenje koje će biti ustavno, zakonito i provedivo.

Vlada FBiH ponovo će razmatrati odluku o ograničavanju marži

**Ranije donesena odluka se neće sprovoditi i zaustave inspekcijske
aktivnosti kontrole provođenja odluke dok se ne održi sjednica Vlade
FBiH**



Na sljedećoj sjednici Vlade Federacija BiH bit će razmotrena optimizacija odluke o propisivanju mjere neposredne kontrole cijena za pojedine osnovne životne namirnice i druge proizvode utvrđivanjem maksimalne marže, a do tada postojeća odluka neće se primjenjivati, dogovoreno je na sastanku predstavnika Vlade FBiH i Udruženja poslodavaca FBiH.

Federalni ministar trgovine Zlatan Vujanović, na konferenciji za novinare nakon sastanka sa predstavnicima Udruženja poslodavaca FBiH rekao je da je potrebna optimizacija kako niko ne bi bio na gubitku, odnosno kako bi amortizacija negativnih uticaja na ekonomiju bila izbalansirana, na optimalnom nivou.

Kako je rečeno nakon sastanka, saglasni su da je zaštita građana na prvom mjestu, ali da se

mora voditi računa i o trgovcima koji zapošljavaju veliki broj građana, kako ne bi poslovali s gubicima. Po riječima Vujanovića, zaštita životnog standarda naših građana, u ovom slučaju je zaštita više od 93.000 uposlenih, konkretno 95.000 uposlenih u trgovini na veliko i malo. Napomenuo je da taj sektor „hrani izravno, dominantno i neizravno, više od pola miliona naših građana“

- Razgovor je bio konkretan i otvoren, da se dođe do optimalnog rješenja, da se optimizira postupanje na terenu. Ono će biti prezentirano na narednoj redovnoj sjednici Vlade FBiH i bit će predmet odlučivanja Vlade FBiH - kazao je ministar Vujanović.



Predsjednik Udruženja poslodavaca FBiH Adnan Smailbegović kazao je da se nada da će korigirana ili optimirana odluka koja bude donesena u četvrtak biti prihvatljiva. Naglasio je da je pored definiranja maksimalne visine marže potrebno razmotriti i obuhvat proizvoda obzirom da po trenutnoj odluci on iznosi od 9.000 do 12.000 proizvoda.

- Prezentirali smo zašto nam ovakva odluka ne odgovara, nije prihvatljiva za naše članice koje se bave veletrgovinom, trgovinom i proizvodnjom – naveo je Smailbegović.

Prema njegovim riječima pored toga neophodno je i definirati dužinu trajanja odluke. Istakao je da ranije donesenu odluku neće sprovoditi, kao i da su zamolili da se zaustave inspekcijske aktivnosti kontrole provođenja odluke dok se ne održi sjednica Vlade FBiH po ovom pitanju, kao i da ostaje neriješeno pitanje kazni koje su zbog neprovođenja odluke trgovci dobili od subote do danas.

Na inicijativu UPFBiH izmjenjena Odluka o propisivanju mjera neposredne kontrole cijena

Pravne i fizičke osobe obavezne su utvrditi i primjenjivati marže tako da one ne prelaze visinu marži tih proizvoda u procentualnom iznosu na dan 31.12.2020. godine

Vlada Federacije Bosne i Hercegovine je na sjednici održanoj 08. aprila 2021. godine izmijenila Odluku o propisivanju mjere neposredne kontrole cijena utvrđivanjem maksimalne visine marži za pojedine osnovne životne namirnice i druge proizvode, na inicijativu Udruženja poslodavaca Federacije Bosne i Hercegovine.



Kako je precizirano izmjenama, pravne i fizičke osobe obavezne su utvrditi i primjenjivati marže tako da one ne prelaze visinu marži tih proizvoda u procentualnom iznosu na dan 31.12.2020. godine.

Obaveza se odnosi na pšenično brašno i sve vrste hljeba od pšeničnog brašna, mlijeko i tekući jogurt 2,8 posto mliječne masti, svježa jaja, šećer kristal bijeli, so za ljudsku ishranu, rižu, tjesteninu, margarin i biljna mast, sve vrste svježeg mesa i ribe, mesne i riblje konzerve, jestivo suncokretovo ulje, formule za dojenčad i formule nakon dojenja, pelene za jednokratnu upotrebu za djecu i odrasle, deterdžent za veš u prahu, deterdžent za suđe tečni i sapun.

Razlog za izmjenu Odluke je optimizacija propisane mjere neposredne kontrole cijena radi postizanja neophodnog balansa između zaštite životnog standarda građana - kupaca i ekonomski održivog poslovanja proizvođača i trgovaca. Pri tome je naglasak na ekonomski

održivom poslovanju malih trgovaca koji su konkurencijski inferiorniji u odnosu na velike.

Kako je obrazloženo, 31.12.2020. godine je određen kao datum koji je prethodio trećem valu pandemije i pogoršanju epidemiološke situacije u FBiH, od kada je i zabilježen i značajniji rast cijena.

Ranije propisana lista osnovnih životnih namirnica i drugih proizvoda reducirana je na ukupno 17 stavki, s tim da i dalje dovoljno široko obuhvaća pojedine osnovne životne namirnice i druge proizvode koji su najbitniji za zaštitu životnog standarda i ekonomskih interesa građana u FBiH.



Izmjenom Odluke se onemogućava ekonomski i društveno neodgovorno, odnosno spekulativno postupanje trgovaca u 2021. godini. Trgovci pad prometa neće moći kompenzirati podizanjem procentualnog iznosa visine marži u odnosu na 31.12.2020. godine. To znači, u slučaju da su trgovci primjenjivali navedenu praksu, sada će biti obavezni smanjiti cijene proizvoda s liste za nedozvoljeni uvećani procentualni iznos marži u odnosu na 31.12.2020. godine.

U obrazloženju je naglašeno da sektor trgovine upošljava više od 95.000 radnika i kad tome dodamo i domaću proizvodnju povezanu s proizvodima s liste, kao i članove njihovih obitelji, to u konačnici broji više od pola miliona građana, čiju egzistenciju i životni standard također treba zaštititi.

**UPFBiH poziva delegate Doma naroda
Parlamenta FBiH da ne usvoje Zakon o stečaju
kojeg je predložila Federalna vlada**


**Bez usvajanja ostalih odredbi koje UPFBiH predlaže u amandmanima
neće se postići željeni cilj i efekat**



Udruženje poslodavaca Federacije Bosne i Hercegovine poziva delegate Doma naroda Parlamenta FBiH da ne usvoje Zakon o stečaju FBiH u obliku kojeg je predložila Vlada FBiH, nego sa amandmanima koje predlaže UPFBiH.

Iako Prijedlog zakona ima kvalitetnih rješenja kojima se pokušalo urediti i popraviti stanje koje je trenutno prisutno u ovoj oblasti, bez usvajanja ostalih odredbi koje UPFBiH predlaže u dostavljenim amandmanima neće se postići željeni cilj i efekat. Stalo se na pola puta, tako da ukoliko se usvoji Vladin Prijedlog zakona o stečaju negativne posljedice će osjetiti svi učesnici u stečajnom postupku, ali i društvo u cjelini.

Za tri do četiri godine doći ćemo u isto ili još gore stanje u odnosu na ono koje imamo sada, odnosno imat ćemo nove slučajeve Aluminija, GRAS-a, rudnika, kliničkih centara i sl.



Predloženi tekst, nema podršku socijalnih partnera, poslodavaca i sindikata, niti je podržan na Ekonomsko-socijalnom vijeću za teritoriju FBiH.

Predloženi zakon ne predviđa obavezno pokretanje stečajnog postupka u slučaju kada su ispunjeni svi zakonski uslovi, kao što je slučaj sa zakonskim rješenjima u cijelom svijetu. To će dovesti do novih političkih manipulacija i sprečavanja otvaranja stečajnog postupka.

Nije predviđena odgovornost stečajnih organa što će potaknuti korupciju, mada su se sve institucije FBiH obavezale na nultu stopu tolerancije za korupciju.

Tekst Prijedloga zakona je tehnički veoma loš, odredbe su neprecizne i nejasne, pojedine odredbe su direktno preuzete iz Zakona o stečaju Republike Hrvatske, bez preuzimanja pratećih odredbi, tako da osnovna odredba gubi smisao.

Rješenja u amandmanima koje je predložilo UPFBiH u potpunosti su usklađena sa direktivama Europske unije koje se odnose na stečaj. Harmonizirana su sa zakonskim rješenjima koja su na snazi u Republici Srpskoj i Brčko Distriktu BiH te kreiran po uzoru na najbolje zakone država članica Europske unije. Više od dvije trećine prijedloga UPFBiH podržano je od strane Međunarodne finansijske korporacije (IFC) koja je učestvovala u pripremi ovog teksta Zakona.

Shodno navedenom, molimo vas da Zakon ne usvajate u predloženom obliku. Predlažemo svim delegatima da amandmane UPFBiH preuzmu kao svoje, jer će se na taj način znatno poboljšati tekst Zakona, koji će dovesti do poboljšanja trenutne situacije u praksi kada je u pitanju stečajni postupak.

UPFBiH ujedno poziva delegate Doma naroda Parlamenta FBiH da usvoje prijedlog Zakona o mirnom rješavanju radnih sporova, jer se radi o kvalitetnom zakonskom rješenju koje će značajno doprinijeti izgradnji modernog radnog zakonodavstva FBiH.



Po hitnom postupku usvojen Prijedlog zakona o stečaju uprkos upozorenjima UPFBiH da predloženi tekst neće riješiti probleme u ovoj oblasti

Iako je Udruženje poslodavaca Federacije BiH pozvalo delegate Doma naroda PFBiH da ne usvoje Zakon o stečaju FBiH u obliku kojeg je predložila Vlada FBiH, nego sa amandmanima koje predlaže UPFBiH, Dom naroda Parlamenta Federacije BiH prihvatio je većinom glasova Prijedlog u obliku koji je Vlada dostavila, a kojim se uređuje predstečajni postupak te uvodi

finansijsko i operativno restrukturiranje privrednih subjekata. Sjednica je održana 29. aprila 2021. godine, a o Prijedlogu se raspravljao po hitnom postupku.

Udruženje je prethodno podsjetilo delegate da se, iako Prijedlog zakona ima kvalitetnih rješenja kojima se pokušalo urediti i popraviti stanje koje je trenutno prisutno u ovoj oblasti, bez usvajanja ostalih odredbi koje UPFBiH predlaže u dostavljenim



amandmanima neće postići željeni cilj i efekat. Također je istaknuto da predloženi tekst nema podršku socijalnih partnera, niti je podržan na Ekonomsko-socijalnom vijeću za teritoriju FBiH.

Udruženje će nastaviti sa insistiranjem na izmjenama Zakona kako bi se isti poboljšao.

Usvojen Prijedlog zakona o mirnom rješavanju radnih sporova



Dom naroda Parlamenta FBiH prihvatio je većinom glasova na sjednici održanoj 29. aprila 2021. godine Prijedlog zakona o mirnom rješavanju radnih sporova.

Prijedlozi i rješenja Udruženja na tekst zakona ugrađena su dok je zakon još uvijek bio u formi nacрта i raspravljan na sjednicama ESV-a. Zakon je usaglašen između socijalnih partnera i Vlade FBiH te podržan od strane Ekonomsko-socijalnog vijeća FBiH i u skladu je sa konvencijama Međunarodne organizacije rada i direktivama Europske unije.

Udruženje poslodavaca smatra da je Prijedloga zakona kvalitetan i predstavlja jedan od značajnijih koraka u procesu izgradnje modernog radnog zakonodavstva Federacije BiH te da je usvajanje ovog zakona od interesa i za radnike i za poslodavce, jer omogućava, zajednički i sporazumno, brzo i efikasno rješavanje pojedinačnih i kolektivnih radnih sporova. Usvajanje ovog zakona je od interesa i za državu, jer rasterećuje sudove od vođenja dugotrajnih i iscrpljujućih postupaka, otklanja negativne posljedice parničenja što utiče na ostvarenje socijalne pravde i opće stabilnosti društvenog uređenja.



Na inicijativu UPFBiH, Vlada FBiH usvojila naredbu kojom se dozvoljava prisustvo većeg broja osoba u trgovinama

Ograničava se broj kupaca tako da se definira prostor od 10m² prodajnog objekta po potrošaču

Vlada FBiH je na hitnoj sjednici održanoj 29. aprila 2021. godine, a na insistiranje Udruženja poslodavaca FBiH, donijela odluku prema kojoj se u veletrgovinama i supermarketima ograničava broj kupaca tako da se definira prostor od 10m² prodajnog objekta po potrošaču. Također, donesena je odluka da bez obzira na veličinu prostora prodajnog objekta, nije dozvoljen boravak više od 400 potrošača.

Članovi Udruženja poslodavaca FBiH, predstavnici trgovaca, veletrgovaca i proizvođača uputili su sredinom aprila Ministarstvu zdravlja FBiH molbu za razmatranje i preinačenje naredbi, a koje se odnose na ograničenje broja ljudi u zatvorenom prostoru, odnosno u trgovinama. Tada je istaknuto da aktivnost obavljanja kupovine nije klasično okupljanje te da je protočna aktivnost visoke fluktuacije ljudi bez dužeg zadržavanja u prostoru i na jednom mjestu. Zatražena je harmonizacija mjera koje se odnose na broj ljudi koji istovremeno prisustvuju u prostoru na nivou cijele države te da se broj kupaca definiše na osnovu prostora od 7m² po potrošaču.



UPFBiH traži hitnu kontrolu zakonitost isplate naknada uposlenicima javne uprave

Decenijama ne postoji solidarnost zaposlenih u javnoj upravi sa uposlenicima u realnom sektoru



Iz Udruženja poslodavaca Federacije Bosne i Hercegovine smatraju zahtjev Samostalnog sindikata državnih službenika i namještenika u organima državne službe, sudskoj vlasti i javnim ustanovama u FBiH za isplatu troškova prevoza i za vrijeme rada od kuće u vrijeme pandemije, nemoralnim, nekolegijalnim, nekorektnim, ali i nezakonitim.

U UPFBiH ističu da već decenijama ne postoji solidarnost zaposlenih u javnoj upravi sa uposlenicima u realnom sektoru. No, ovoga puta su iz Samostalnog sindikata državnih službenika i namještenika u organima državne službe, sudskoj vlasti i javnim ustanovama u FBiH vrlo jasno demonstrirali da u fokusu njihovog rada nije interes članstva, nego pojedinaca i interesnih grupa.

Pitanje za predsjednika ovog sindikata Samira Kurtovića i članove sindikata je da li je moralno i

kolegijalno zahtijevati isplatu naknada za prevoz za uposlenike u javnoj upravi koji su radili od kuće, jednako kao i za ljekare, policajce, vatrogasce koji su svakodnevno na svojim radnim mjestima i na terenu.



Na stranu činjenica što čelni čovjek Sindikata prilično jednostrano tumači Zakon i Kolektivni ugovor. Podsjećamo da prema članu 28. Kolektivnog ugovora za službenike organa uprave i sudske vlasti u FBiH, državnom službeniku ili namješteniku kome nije organizovan prevoz na posao i sa posla, a čije je mjesto stanovanja od mjesta rada udaljeno minimalno od dva do četiri kilometra, pripada

naknada za troškove prevoza, čija će visina i način utvrđivanja biti utvrđeni posebnim propisima vlada, gradskih i općinskih vijeća, uz konsultacije sa reprezentativnim sindikatom.

Dakle, Kolektivnim ugovor je definirano da se naknada isplaćuje za stvarne troškove prevoza, tako da ako radnik nije koristio prevoz ne može ni ostvariti naknadu za te troškove.

Udruženje, zbog ovih, ali i brojnih drugih slučajeva sumnjivog korištenja budžetskih sredstava, poziva nadležna tužilaštva, inspeksijske organe i urede za reviziju da kontroliraju trošenje javnih sredstava za isplatu različitih naknada. Nadležne institucije trebaju utvrditi kako su se u javnoj upravi isplaćivale naknade za topli obrok, prevoz, odvojeni život, službena putovanja tokom pandemije COVID-19.

Podsjećaju da svjedočimo održavanju sjednica parlamenata na različitim nivoima u online formatu te da je u skladu sa tim potrebno provjeriti i utvrditi da li je u tom periodu bilo isplate troškova za npr. odvojeni život, iako su zastupnici i delegati sjednicama prisustvovali iz udobnosti vlastitih domova.


Iz UPFBiH ne spore da postoji pravo isplate naknada po različitim osnovama, ali naglašavaju da se to pravo može koristiti samo ukoliko su ispunjeni uslovi za isplatu naknade – u konkretnom slučaju, troškovi prevoza mogu biti isplaćeni samo onima koji su dolazili na posao.



Poslodavci sa rezidentnim predstavnikom MMF-a o efektima pandemije na privredu


Ekonomska situacija, efekti pandemije na privredu i garantni fond FBiH bili su tema sastanka

Ekonomska situacija, efekti pandemije na privredu i garantni fond FBiH bili su tema sastanka predstavnika Udruženja poslodavca FBiH i rezidentnog predstavnika MMF-a u BiH Andrewa Jewella. Sastanku su prisustvovali predsjednik i direktor UPFBiH Adnan Smailbegović i Mladen Pandurević, članovi UO Snježana Koepruner i Safudin Čengić te član delegacije poslodavaca u ESV-u FBiH Edin Ibrahimpašić, a održan je na inicijativu rezidentnog predstavnika MMF-a.



Rezidentnog predstavnika je najprije zanimala procjena poslodavaca o dubini trenutne krize. Predsjednik UPFBiH Adnan Smailbegović kazao je da je evidentno da su određeni sektori teško pogođeni, te da će biti potrebno više vremena za njihovu restauraciju, ali da su kompanije izvozno orijentirane uglavnom dobro podnijele teret krize. Direktor UPFBiH Mladen Pandurević istakao je da na nacionalnom nivou nije bila niti jedna mjera za pomoć privredi, a

da su mjere Vlade FBiH i nižih nivoa vlasti loše dizajnirane, zakašnjele, nedovoljne i loše targetirane. Podsjetio je da je UPFBiH dostavilo set mjera za pomoć privredi, a koje podrazumijevaju kratkoročne, srednjoročne i dugoročne mjere čijim usvajanjem bi se umanjile posljedice pandemije na ekonomiju.



"Bosni i Hercegovini su potrebni reformske mjere, reformski procesi, a to je smanjenje opterećenja cijene rada uz neophodno smanjenje stope doprinosa i poreza kako bi se mogla povećati minimalna plaća, što svakako zagovaramo. Također, potrebno je poboljšati privredu kroz savremenu tehnologiju, odnosno podići standard radnika kroz povećanje produktivnosti tehničkog unapređenja" istakao je Smailbegović.

Jewella je također interesovalo stajalište Udruženja o garantnom fondu, odnosno zašto se ovaj program nije pokazao učinkovitim. Poslodavci su istakli da ova linija nije privlačna jer su kriteriji za dodjelu sredstava prilično strogi, a da komercijalne banke u konačnici donose odluku, te da bi više poslodavaca koristilo Fond da se kamate refundiraju, olakšaju kriteriji i proširi krug subjekata koji imaju pravo na kredit.

Prisutni su također razgovarali o Odluci o propisivanju mjera neposredne kontrole cijena, odljevu radne snage, štetnosti koju prouzrokuje neformiranje Komisije za vrijednosne papire, elektronskom potpisu, kao i o bankarskim aktivnostima tokom pandemije.



UPFBiH zahtijeva od federalnih institucija što hitnije formiranje Komisije za vrijednosne papire FBiH

Blokirano je stotine predmeta i stotine miliona KM kapitala koji je u vrijeme pandemije COVID-19 prijeko potreban

Udruženje poslodavaca Federacije Bosne i Hercegovine pridružuje se Zajedničkoj izjavi Delegacije Europske unije u BiH, Ambasade Sjedinjenih Američkih Država, Ambasade Ujedinjenog Kraljevstva i Ureda visokog predstavnika koji su od nadležnih federalnih institucija zatražili deblokadu rada Komisije za vrijednosne papire FBiH. Iz UPFBiH insistiraju na hitnoj provedbi zakonskih procedura sa ciljem imenovanja članova Komisije za vrijednosne papire FBiH.

Zbog nefunkcioniranja Komisije za vrijednosne papire FBiH duže od godinu dana privreda Federacije BiH trpi ogromne posljedice. Blokirano je stotine predmeta i stotine miliona KM kapitala koji je u vrijeme pandemije COVID-19 prijeko potreban za održavanje proizvodnje, investiranje u nove tehnologije, očuvanje postojećih i otvaranje novih radnih mjesta.

Posebno ističemo da je Komisija za vrijednosne papire najvažnija institucija na finansijskom tržištu FBiH koja već duže od godinu dana ne obavlja svoju primarnu i zakonom definiranu funkciju, a to je zaštita investitora i nadzor tržišta i učesnika na tržištu te nadzor emisije i prometa vrijednosnih papira, čime se rizikuje nastanak materijalne štete privredi, bankama, dioničkim društvima, dioničarima i investitorima. U ovome trenutku oko 400 zahtjeva pravnih subjekata čekaju konačne odluke koje može donijeti samo Komisija za vrijednosne papire FBiH.

Zbog svega navedenog UPFBiH zahtijeva od nadležnih institucija da hitno provedu zakonom propisane procedure, kako bi Parlament FBiH imenovao članove Komisije za vrijednosne papire FBiH, kako bi Komisija hitno počela sa radom i deblokirala procese koji koče razvoj privrede, investicijskog i tržišta kapitala u FBiH.

Garantni fond tema sastanka predstavnika UPFBiH i Svjetske banke

Ova linija poslodavcima nije pretjerano privlačna jer su kriteriji strogi

Na inicijativu Svjetske banke, a kako bi se diskutovalo o progresu u implementaciji sistema garancija za vanrednu situaciju izazvanu Covidom-19, održan je sastanak predstavnika Svjetske banke i Udruženja poslodavaca. Sastanak je održan 12. aprila 2021. godine, a prisustvovao je direktor Udruženja poslodavaca FBiH Mladen Pandurević i konsultanti Svjetske banke Andrew Lovegrove i Mirzet Ribić.

Direktor Udruženja poslodavaca FBiH Mladen Pandurević kazao je da ova linija poslodavcima nije pretjerano privlačna jer su kriteriji strogi.

Napomenuo je da u usvojenom Budžetu Federacije BiH za 2021. godinu postoje četiri grupe sredstava namijenjene za pomoć privredi, a da je jedna od njih i Garancijski fond.

Istakao je da je Udruženje Vladi FBiH dostavilo set mjera koje imaju za cilj pomoć privredi za saniranje negativnih posljedica pandemije COVID-19 i sprečavanje daljeg pada ekonomije, očuvanje zaposlenosti, zaštita budžeta i vanbudžetskih fonova, te pozitivan uticaj na vanjskotrgovinski bilans. Jedna od mjera odnosila se i na Garantni fonda. Udruženje je zahtijevalo redefinisane kriterija za dodjelu sredstava koji su ocijenjeni kao strogi i koji čine sredstva Fonda neatraktivnim, proširivanje krug subjekata koji imaju pravo na kredit kako bi se namijenjena sredstva plasirala u ekonomiju i što prije dala željene rezultate, da prvenstvo moraju imati izvozno orijentisane kompanije i kompanije koje zapošljavaju nove radnike kao one koji kreiraju novu vrijednost te da se jasno definiše da sve kompanije koje uredno izmiruju obaveze po osnovu kredita će biti regresirane za iznos kamate najmanje za 50 posto.





Otvoreno pismo Tegeltiji i Bevandi: Hitno pokrenite procedure za potpisivanje bilateralnih sporazuma o povratu PDV-a

Time će se omogućiti povrat PDV-a domaćim privrednicima na bazi reciprociteta

Udruženje poslodavaca FBiH uputilo je otvoreno pismo predsjedavajućem Vijeća ministara BiH Zoranu Tegeltiji i ministru finansija i trezora BiH Vjekoslavu Bevandi u kojem se traži da se hitno pokrene procedura za potpisivanje bilateralnih sporazuma o povratu PDV-a. U pismu se navodi:

Obraćamo Vam se u ime više od 20.000 članica Udruženja poslodavaca FBiH, PDV obaveznika, koji duže od deset godina ne mogu realizirati svoje pravo na povrat PDV-a iz inostranstva.

Duže od deset godina UPFBiH je insistiralo na izmjeni članova 94. i 95. Pravilnika o primjeni Zakona o PDV-u, kako bi se stvorili uslovi za uspostavljanje principa uzajamnosti povrata PDV-a, odnosno, zaključivanja bilateralnih sporazuma sa drugim državama, na osnovu kojih bi bh. privrednici ostvarili pravo na povrat PDV-a iz inostranstva.

Zbog odbijanja Upravnog odbora Uprave za indirektno oporezivanje BiH da izvrši izmjene Pravilnika, UPFBiH je podnijelo krivičnu prijavu 20.11.2019. godine protiv članova UO UIO BiH zbog nedonošenja izmjena i dopuna Pravilnika. Na osnovu naše prijave, a po nalogu Tužilaštva BiH SIPA vrši istražne radnje.

Nakon podnesene krivične prijave, UO UIO BiH je konačno prošle godine donio Pravilnik o izmjenama i dopunama Pravilnika o primjeni Zakona o porezu na dodanu vrijednost („Službeni glasnik BiH", broj: 44/20, od 24.07.2020. godine) kojim su izmijenjeni članovi 94. i 95. na način da se stvaraju zakonske pretpostavke za uspostavljanja principa uzajamnosti povrata PDV-a.

No, bez obzira što su donesene izmjene i dopune Pravilnika, nadležne institucije Bosne i Hercegovine još nisu pokrenule postupak za zaključenje bilateralnih međunarodnih ugovora. Države sa kojima treba zaključiti ugovor, a koje imaju uslov uzajamnosti i ne vraćaju PDV bh. kompanijama već godinama su: Hrvatska, Slovenija, Italija, Mađarska, Poljska, Češka, Grčka, Bugarska, Rumunija, Španija i Švicarska.

Podsjećamo da su nadležne institucije Hrvatske još 2011. godine uputile institucijama u Bosni i Hercegovini pismo namjere za potpisivanje sporazuma, na osnovu kojeg bi bio omogućen povrat PDV-a kompanijama u BiH. Međutim, potpisivanje sporazuma nije bilo moguće dok se ne usvoje izmjene i dopune Pravilnika.



Udruženje poslodavaca FBiH je 26.11.2020. godine uputilo Ministarstvu finansija i trezora BiH i Vijeću ministara BiH dopis u kojem smo zatražili hitno pokretanje inicijative za zaključivanje bilateralnih međunarodnih ugovora u skladu

sa članom 4. Zakona o postupku zaključivanja i izvršavanja međunarodnih ugovora (Službeni glasnik BiH 29/00 i 32/13). Međutim, do danas, ništa nije urađeno po tom pitanju. Ponovo smo 12.03.2021. godine uputili urgenciju i ukazali na značaj zaključivanja bilateralnih međunarodnih ugovora, ali nikada nismo dobili odgovor od Vijeća ministara BiH, niti od nadležnog ministarstva.

O značaju hitnog potpisivanja bilateralnih ugovora o uzajamnom povratu PDV-a za bh. privrednike, najbolje govori činjenica da bi iznos PDV-a koji bi se vratio bh. privrednicima iz Hrvatske bio sedam puta veći od iznosa PDV-a koji bi se iz Budžeta BiH vraćao privrednicima u Hrvatskoj. Zbog svega navedenog, ponovo insistiramo i javno pozivamo Vas kao čelne ljude Vijeća ministara Bosne i Hercegovine i resornog Ministarstva finansija i trezora BiH da hitno pokrenete inicijativu za zaključivanje bilateralnih međunarodnih ugovora, pogotovo sa Hrvatskom i Slovenijom. Time će se omogućiti povrat PDV-a domaćim privrednicima na bazi reciprociteta.

UPFBiH i UUPRS traže aktivaciju rada radnih grupa pri Vijeću ministara BiH




Udruženje poslodavaca FBiH i Unija udruženja poslodavaca RS su nakon održanog sastanka sa Tegeltijom u februaru 2020. godine i na pismeni zahtjev predsjedavajućeg Vijeća ministara BiH Zorana Tegeltije, u julu mjesecu 2020. godine imenovali predstavnike u pet radnih grupa koje su formirane pri Vijeću ministara BiH.

Ove dvije organizacije su predstavnike imenovala u Radnu grupu za indirektno poreze, Radnu grupu za javne nabavke, Radnu grupu za unaprjeđenje zaštite domaće proizvodnje, Radnu grupu za unaprjeđenje oblasti saobraćaja i Radnu grupu za smanjenje opterećenja rada. Zadatak ovih tijela je da pripreme analizu stanja u oblasti za koju su zadužene, istraže rješenja za unaprjeđenje navedene oblasti, te Vijeću ministara BiH predlažu rješenja koja će unaprijediti navedenu oblast. Međutim, od imenovanja predstavnika prošlo je više od osam mjeseci, te iako su UPFBiH i UUPRS dostavljale urgencije, radne grupe još uvijek nisu počele sa radom.

Obzirom da je rad radnih grupa od izuzetnog značaja i u zajedničkom interesu Vlade, poslodavaca kao i cjelokupne društvene zajednice, UUPRS i UPFBiH su uputili zajednički dopis Tegeltiji sa zahtjevom da se u narednih 15 dana aktivira rad navedenih radnih grupa.

Finalna konferencija projekta "Stručno osposobljavanje i zapošljavanje mladih i žena u drvnoj industriji"

Finalna konferencija zajedničkog projekta Udruženja poslodavaca FBiH i USAID WHAM "Stručno osposobljavanje i zapošljavanje mladih i žena u drvnoj industriji" održana je 15. aprila 2021. godine. Cilj ovog projekta je profesionalno osposobljavanje 40 nezaposlenih mladih i žena za pozicije tapetara i modelara koja su deficitarna u drvnoj industriji, te osigurati zaposlenje kod poznatog poslodavca za minimalno 90 posto sudionika od kojih se očekuje da uspješno završe tromjesečni proces obuke.



Direktor USAID WHAM projekta Fuad Ćurčić čestitao je Udruženju na realizaciji uspješnog i značajnog projekta te istakao veliko zadovoljstvo saradnjom sa Udruženjem posebno u učinkovito prevazilaženju izazova sa kojima se implementator suočavao.

Koordinator projekta UPFBiH Husein Al-Baldawi je podsjetio da je drvna industrija u FBiH izvozno orijentisana i da bilježi konstantan rast, ali da same kompanije često ne mogu udovoljiti narudžbama inostranih kupaca uslijed nedostatka kvalifikovanih tapetara i modelara, te da se kompanije, iako se radi o radnim mjestima koja su za 20% više plaćena od prosječnih plaća u sektoru, suočavaju s deficitom navedenih kadrova.


"Udruženje poslodavaca FBiH je u saradnji s Federalnim zavodom za zapošljavanje pronašlo 40 kandidata za program obuke za tapetare i modelare. Kandidati su prošli teorijski i praktični dio obuke, te je 39 njih zadovoljilo kriterije za zaposlenje na pozicije tapetara i modelara, a 26 polaznika je zaposleno. Ističemo da su kompanije bile spremne zaposliti sve kandidate koji su uspješno završili program obuke, ali da su polaznici iz ličnih razloga odbili", kazao je Al-Baldawi.



Praktični dio obuke obavljen je u pogonima kompanija Fen, Nobil i WoodTeam koje su osigurale sve neophodne uslove za izvođenje obuke, odnosno mentore, mašine, opremu, prevoz i topli obrok.

"Sa svim kandidatima smo bili izuzetno zadovoljni i svima smo ponudili zaposlenje. Najizazovniji dio Projekta su komplikovane procedure izvještavanja, ali na kraju se isplati jer smo na zadovoljstvo nas i radnika mogli uposliti još sedam osoba koje su prošle obuku", kazala je izvršna direktorica Nobila Irena Bajo.

Izvršna direktorica Woodteam-a Jasminka Mimić izrazila je zadovoljstvo rezultatima projekta kojim se omogućilo zaposlenje 18 polaznika u ovoj kompaniji. Naglasila je da su ovakvi projekti jako korisni jer je primjetan povećan odljev radne snage, te da kompanijama treba pomoći da zadrže radnike. Direktor UPFBiH Mladen Pandurević zaključio je da projekti trebaju uključivati veći broj polaznika, biti izdašniji i namijenjeni za kupovinu savremene opreme, jer jedini izlaz iz krize jeste podizanje produktivnosti putem novih tehnologija.



Uz podršku Europske unije do Okvirnih smjernica o implementaciji Vodećih načela o poslovanju i ljudskim pravima UN-a


Kako bi se osiguralo bolje poštivanje ljudskih prava u privrednom sektoru, Institut za razvoj mladih KULT u saradnji sa Udruženjem poslodavaca FBiH je, uz finansijsku podršku Europske unije, pokrenuo inicijativu koja će uspostaviti standardnu politiku i definisati praktična uputstva za bh. kompanije u cilju jačanja korporativne odgovornosti po pitanju poštivanja ljudskih prava u BiH, utemeljena na Vodećim načelima UN-a.

U dosadašnjoj implementaciji Inicijative provedena je analiza o stanju ljudskih prava u privrednom sektoru u BiH, izrađena Metodologija za izradu Povelje o ljudskim pravima u privrednom sektoru u BiH kao i sama Povelja koju su potpisali više od 80 kompanija u BiH, te poslodavačka i druga udruženja. Također, pokrenut je prvi servis za razvijanje korporativnog volontiranja u BiH, www.volontiraj.ba i napravljen dokument Okvirne smjernice BiH za implementaciju UNGP-a 2021.-2025.

"U doba globalne međuzavisnosti, društveno odgovorno poslovanje je sve važnije, a odgovoran odnos prema poslovanju znači i održiviji ekonomski razvoj. Veoma smo ponosni na ovaj projekat. Imamo odlične rezultate koji će, sigurna sam, pomoći nadležnim institucijama da primjene osnovna načela u poštivanju ljudskih prava u poslovanju", kazala je program menadžerica Delegacije EU u BiH Ajša Adrović-Bešlagić na sastanku održanom 27. aprila 2021. godine kada su i predstavljene "Okvirne smjernice za implementaciju Vodećih načela o poslovanju i ljudskim pravima UN-a".

Voditeljica programa ispred KULT-a Mirela Geko naglasila je da ove smjernice pokazuju spremnost BiH da unaprijedi zaštitu ljudskih prava u poslovanju, a kroz sam dokument će pojačati zalaganje nadležnih institucija za poštivanje ljudskih prava u poslovanju.

"Prilikom izrade Okvirnih smjernica, konsultovan je i Zakon o ravnopravnosti spolova u BiH i



Zakon o zabrani diskriminacije u BiH te se posebna pažnja posvetila rodnoj ravnopravnosti. Mnoge institucije, među kojima je i pravna sekcija Delegacije EU u BiH, su dale svoje komentare koje su uvrštene u konačnu verziju Okvirnih smjernica i na taj način poboljšale ovaj dokument. Od svih relevantnih institucija smo dobili pozitivno mišljenje. Ovaj dokument sadrži set smjernica za države, privredni sektor i sve one kojima su narušena ljudska prava u poslovanju, s ciljem sprječavanja, adresiranja i dostupnosti pravnog lijeka za oštećene u toku poslovnih operacija", istakla je Geko.

Naredni koraci u implementaciji projekta su slanje inicijative prema Uredu za zakonodavstvo BiH, organizacija sastanaka sa predstavnicima vlasti u BiH na kojima bi se predstavio ovaj dokument i u konačnici slanje inicijative Vijeću ministara BiH na usvajanje.

"Ovo je dobar institucionalni okvir za jačanje vladavine prava u BiH, a što je bitno za snaženje integracija i približavanje članstvu EU. Imamo prilično solidan pravni okvir za poštivanje prava, međutim problem je implementacija. Neophodno je sinergijsko djelovanje svih institucija na implementaciji ovih smjernica", kazao je sekretar Ministarstva raseljenih osoba i izbjeglica FBiH Esad Ivojević.

Na sastanku je istaknuto da su ovo okvirne smjernice, te da se one, i kada se usvoje, mogu prilagođavati u skladu sa promjenom zakonske regulative i na taj način unapređivati.

Sekretar Udruženja poslodavaca FBiH Mersiha Jusić pozvala je predstavnike institucija da u okviru svoje nadležnosti učine napore kako bi se ovaj dokument usvojio i implementirao, te napomenula da će Smjernice poslužiti i za donošenje nekih drugih zakona.

Sastanku su prisustvovali predstavnici Federalnog ministarstva raseljenih osoba i izbjeglica, Ministarstva razvoja, poduzetništva i obrta FBiH, Ministarstva civilnih poslova, Ministarstva obrazovanja i nauke FBiH, Ureda Vlade USK, Privredne komore FBiH, Saveza samostalnih sindikata BiH, Agencije za ravnopravnost spolova BiH, Delegacije Europske unije u BiH, Udruženja poslodavaca FBiH, Unije udruženja poslodavaca RS i Udruženja poslodavaca Brčko Distrikta. Projekat „Poboljšanje ljudskih prava u privrednom sektoru" implementira Institut za razvoj mladih KULT u saradnji sa Udruženjem poslodavaca FBiH, a uz finansijsku podršku Europske unije.

Poziv za prijavu nezaposlenih mladih i žena na učešće u projektu "Stručno osposobljavanje i zapošljavanje u tekstilnoj industriji"



Udruženje poslodavaca FBiH će početkom maja mjeseca 2021. godine započeti projekat „Stručno osposobljavanje i zapošljavanje nezaposlenih mladih i žena u tekstilnoj industriji“ s ciljem stručnog osposobljavanja 40 polaznika za zanimanje krojač/šivač i montažer u proizvodnji obuće.

Kompanije u kojima će se vršiti obuka s mogućnošću zapošljavanja su Makama d.o.o. Bugojno, Positive group d.o.o. Bugojno i Tex Team d.o.o. Visoko. Kompanije Makama d.o.o. i Positive group d.o.o. iz Bugojna će vršiti obuke po deset krojača/šivača i deset montažera obuće u proizvodnji obuće, dok će kompanija Tex Team d.o.o. iz Visokog vršiti obuku 20 krojača/šivača.

Polaznicima će prije same praktične obuke u trajanju od tri mjeseca biti omogućena i teoretska nastava u trajanju od 15 dana. Teoretska nastava će biti organizovana online putem Zoom aplikacije. Polaznicima će tokom obuke biti osigurani troškovi prevoza, obavezno osiguranje i ishrana.

Održana sjednica ESV-a FBiH

Sedma (127.) sjednica Ekonomsko-socijalnog vijeća za teritoriju Federacije BiH održana je 15. aprila 2021. godine.

Na sjednici je razmatrana simulacija uticaja prijedloga zakona o doprinosima, te porezu na dohodak na plate. Na dnevnom redu bio je i Zakon o reprezentativnosti sindikata i udruženja poslodavaca, te informacija delegacije sindikata i poslodavaca o Prednacrtu zakona o vijeću zaposlenika.



Razmatrana su i tri pravilnika iz oblasti zaštite na radu. Riječ je o pravilnicima o uslovima koje moraju ispunjavati radnici za zaštitu na radu, potom o sadržaju, načinu i troškovima polaganja stručnog ispita radnika koji obavljaju stručne poslove iz oblasti zaštite na radu, te pravilnik o načinu i uslovima obavljanja poslova zaštite na radu kod poslodavca.

Također jedna od tačaka bili su i izvještaji o radu i realizaciji zaključaka, te finansijskom poslovanju Ekonomsko-socijalnog vijeća za teritoriju FBiH za prošlu godinu.

Na inicijativu UPKS u KS članarine Turističkoj zajednici smanjene za 50 posto za kalendarsku 2021. godinu

Skupština Kantona Sarajevo je na hitnoj sjednici razmatrala Prijedlog zakona o dopuni Zakona o turizmu Kantona Sarajevo i usvojila Zakon o dopuni Zakona o turizmu KS.



"Turizam je svakako jedna od najpogođenijih privrednih grana i ovo umanjeње članarine Turističkoj zajednici KS za 50 posto je nastojanje Vlade i Ministarstva privrede KS da se privreda rastereti, ali i da se Turističkoj zajednici omogući neometano obavljanje njenih djelatnosti. Naime, ovo umanjeње za 50 posto članarine za kalendarsku 2021. godinu, znači da će Turističkoj zajednici ostati pedeset posto sredstava po osnovu članarina iz ove godine. Osim toga, prihodi od članarine nisu jedini izvor prihoda Turističke zajednice. Također, prihodi od boravišne takse su prihodi Turističke zajednice KS, kao i drugi načini finansiranja u skladu sa Zakonom o turizmu. S druge strane, privreda će biti rasterećena značajnim sredstvima koja će se osloboditi ovim smanjenjem članarine. Ukoliko uzmemo u obzir i nedavno smanjenje nameta za Općekorisne funkcije šuma, pretpostavka je da će ukupno rasterećenje privrede u 2021. godini, po osnovu parafiskalnih nameta, biti značajno" kazao je ministar privrede KS Adnan Delić.

Zakon je objavljen u Službenim novinama Kantona Sarajevo broj 13/21, od 1. aprila 2021. godine.

Dopuna podrazumijeva umanjenje iznosa plaćanja članarine Turističkoj zajednici pravnih lica za 50 posto, odnosno s dosadašnjih 0,05 posto na 0,025% za 2021. godinu. Ministar će najkasnije u roku od deset dana od dana stupanja na snagu ovog zakona, Pravilnikom o djelatnostima obaveznih članova Turističke zajednice Kantona Sarajevo utvrditi djelatnosti na koje se primjenjuje ova izmjena.


Udruženje poslodavaca KS godinama zahtjeva i upućuje inicijative za smanjenje iznosa za plaćanje članarine, te je i ova izmjena zakona donesena na insistiranje Udruženja.

Održana sjednica UO Udruženja poslodavaca Kantona Sarajevo

Na XX redovnoj sjednici Upravnog odbora Udruženja poslodavaca Kantona Sarajevo, održanoj 01. aprila 2021. godine, Upravni odbor jednoglasno je usvojio Izvještaj o radu Udruženja za 2020. godinu te iskazao zadovoljstvo učinjenim u prethodnoj godini koja je obilježena otežanim radom uslijed pandemije koronavirusa.

Usvojen je zaključak da se počne s pripremama za održavanje redovne sjednice Skupštine UPKS, te da će se donijeti Odluka o terminu održavanja sjednice i dnevnom redu. Skupština će biti održana u online formatu.

Predsjednik Upravnog odbora Safudin Čengić informisao je članove o aktivnostima Vlade Kantona Sarajevo za pomoć privredi u saniranju negativnih ekonomskih posljedica pandemije COVID-19 u proteklih godinu dana i mjerama koje se najavljuju kao pomoć nadležnih vlasti Kantona i Federacije BiH. Zaključeno je da će se Udruženje poslodavaca KS obratiti premijeru Vlade Kantona Sarajevo s prijedlogom mjera za pomoć privrednim subjektima i obrtnicima u Kantonu Sarajevo, te da će zahtijevati održavanje sastanaka s premijerom Vlade KS i ministrom privrede KS.



Upravni odbor je usvojio zaključak da će uputiti dopis sa zahtjevom za održavanje sastanka premijeru Vlade KS i resornom ministru vezano za Odluku Vlade Kantona Sarajevo o cijeni komunalnih usluga iz segmenta zajedničke komunalne potrošnje iz 2020. godine. Naime, prema ovoj odluci usvojena je nova metodologija obračuna cijene odvoza otpada, odnosno prelazi se sa obračuna koji za osnovu ima površinu korisne izgrađene površine na zapreminu stvarno odvezenog otpada. Odluka se nikada nije primijenila u praksi i odvoz otpada se obračunava prema staroj metodologiji.

Pod tekućim pitanjima Refik Šećibović, koji je imenovan u Komisiju za izradu Zakona o visokom obrazovanju KS ispred Udruženja poslodavaca KS, izvjestio je UO o radu Komisije, te je usvojen zaključak da članovi UO dostave svoje mišljenje u pisanoj formi o Zakonu o visokom obrazovanju.

Također, Alidjana Čubro, koje je ispred UPKS u Sarajevo imenovana u radnu grupu za analizu Nacrta zakona o dualnom obrazovanju, izvjestila UO o svom radu u istoj.



Prijedlog mjera za pomoć privrednim subjektima i obrtnicima u KS


Upravni odbor Udruženja poslodavaca Kantona Sarajevo, na sjednici održanoj 01.aprila 2021. godine, razmatrao je Informaciju o negativnim efektima pandemije koronavirusa po poslovanje poslovnih subjekata u realnom sektoru kao i mjere koje se najavljuju kao pomoć nadležnih vlasti Kantona i Federacije BiH tokom 2021. S tim u vezi, Udruženje poslodavaca KS dostavilo je Vladi KS prijedlog mjera za pomoć privrednim

subjektima i obrtnicima u KS:

1. Opći stav članica Udruženja poslodavaca jeste da je stanje poslovanja, izazvano pandemijom Covida-19, kod velikog broja privrednih subjekata i obrtnika, usloženo i dovedeno do nivoa opstanka. Širenje pandemije u KS, veliki broj pozitivnih i umrlih od virusa, kao i mjere donesene od strane kriznih štabova utječu na kretanje stanovništva čime je, ionako mali broj korisnika posebno u uslužnom sektoru, sveden na minimum i time na njihovo nerentabilno poslovanje.
2. Od početka pandemije Udruženje poslodavaca KS bilo je partner vlastima i institucijama Kantona Sarajevo i davalo puni doprinos u donošenju odluka i mjera za suzbijanje pandemije, zadržavanju radnih mjesta i opstanku privrednih subjekata i obrtnika. Nažalost, Upravni odbor UP izražava svoje nezadovoljstvo i čuđenje da Vlada KS, u prva tri mjeseca, nije našla za shodno da organizira sastanak sa predstavnicima Udruženja poslodavaca koje zastupa i predstavlja najveći broj poslodavaca u Kantonu Sarajevo.
3. Upravni odbor UP KS ne spori Vladi da donosi potrebne mjere za suzbijanje širenja pandemije i kroz tzv. "lockdown" zabrani radi određenih djelatnosti na području Kantona Sarajevo. Svakako da podržavamo poteze kojima ćemo zaštititi zdravlje i živote građana pa i naših uposlenika. Međutim, stava smo da, prije nego se donese neka mjera koja znači

obustavu rada poslovnih subjekata u određenim djelatnostima Vlada treba čuti mišljenje poslovne zajednice i na bazi istoga donijeti konačnu odluku. Sigurni smo da bi mišljenja Vlade i prijedlozi poslovne zajednice bila približno ista, uz istovremeno donošenje mjera finansijske pomoći uposlenicima i privredni subjektima kao i obrtnicima čiji je rad zabranjen ili rade u otežanim uslovima, čime bismo ublažili zabrinutost posebno manjih poslodavaca i obrtnika.

4. Mjere Vlade KS, donesene u martu mjesecu, koje su produžene i za prvu polovinu mjeseca aprila, a kojima se zabranjuje rad ugostiteljske djelatnosti cijenimo kao nešto što, po procijeni relevantnih faktora iz zdravstva i izvršne vlasti, može doprinijeti zaštiti zdravlja i života građana Kantona Sarajeva kao i naših uposlenika. Međutim, i ovom prilikom ukazujem da Vlada nije našla za shodno da se konsultira sa poslovnom zajednicom čime je ostavila prostor za njeno nezadovoljstvo i različito tumačenje donesenih odluka.



5. Kroz izjave Ministra privrede KS i natpisa u medijima možemo zaključiti da je, za saniranje negativnih posljedica koronavirusa i pomoći zbog zabrane rada, osiguran 21 milion konvertibilnih maraka koje, odmah, mogu biti na raspolaganju privrednicima i obrtnicima. Nažalost, niko od članova Udruženja poslodavaca KS nema uvid u kriterije niti u način kako mogu aplicirati za korištenje navedenih sredstava.

6. Imajući u vidu iznimno tešku situaciju u kojoj se nalaze privredni subjekti i obrtnici, Upravni odbor UP KS stoji na stanovništvu da planirana sredstva, odmah, moraju biti na raspolaganju i

to na sljedeći način:

- Hitno, u roku od dva dana, utvrditi kriterije i donijeti odluku o raspisivanju Javnog poziva za prijavu privrednih subjekata i obrtnika iz Kantona Sarajevo za pomoć u isplati dijela ili cjelokupnog iznosa minimalnih plaća sa pripadajućim porezima i doprinosima.
- Uvrštavanje kriterija predloženih od strane Upravnog odbora UP KS a koji se ogledaju u isplati:
 - ◇ Svim privrednim subjektima i obrtnicima, neovisno od broja dana zabrane u određenom mjesecu, participirati 100% mjesečne minimalne plaće, doprinosa i poreza u 2021 godini za prijavljene radnike u određenom mjesecu (samo za subjekte kojima je rad iz osnovne djelatnosti zabranjena odlukom Vlade ili koji imaju odvojen segment obuhvaćen zabranom rada a koji je registrovan kao poseban ili dio pravnog subjekta – ID broj, šifru djelatnosti I broj uposlenih prijavljenih toj jedinici;
 - ◇ 50% mjesečne minimalne plaće, doprinosa i poreza u 2021. godini za uposlenike kod poslodavca i obrtnika kod kojih je evidentiran pad prihoda iznad 30% u odnosu na ostvareni prosječan prihod u mjesecima prije pandemije korona virusa u 2020. godini (januar i februar)
 - ◇ 30% mjesečne minimalne plaće, doprinosa i poreza u 2021. godini za uposlenike kod poslodavca i obrtnika koji ima pad prihoda iznad 20% u odnosu na ostvareni prosječan prihod u mjesecima prije pandemije korona virusa u 2020. godini (januar i februar).
- Iz planiranih sredstava u Budžetu KS na ime kreditnog fonda izdvojiti sredstva za pokriće kamata, u 2021. godini, za nove ali i zamjenske kredite. Svjedoci smo da određeni broj privrednih subjekata i obrtnika nema nikakve, ili ima znatno smanjene poslovne aktivnosti a ima kreditne obaveze i koje su uzeti za ulaganje u objekte ili opremu koje su trenutno nefunkcionalni.
- Novom podrškom potrebno je obuhvatiti uposlenike koji, na dan raspisivanja Javnog poziva, imaju zaključen Ugovor o radu kod privrednog subjekta koji ima obustavu ili pad prihoda utvrđen definiranim kriterijima.

UPKS traži da izjednačavanje radnog vremena ugošteljskih subjekata otvorenog i zatvorenog tipa

Ugošteljski sektor je na rubu kolapsa čime je direktno ugrožen veliki broj radnih mjesta

Zaključkom Vlade KS od 21.04.2021. godine dozvoljava se rad ugošteljskim subjektima u zatvorenom prostoru sa radnim vremenom do 20:00 sati, uz



prisustvo maksimalno četiri lica za jednim stolom, odnosno 20 lica u objektu, uz poštivanje svih higijensko-epidemioloških mjera.

Ugošteljski sektor je na rubu kolapsa čime je direktno ugrožen veliki broj radnih mjesta, a samim tim i stabilnost Budžeta Kantona Sarajevo. Članovi Udruženja poslodavaca KS iz sektora ugošteljstva smatraju da se ovim zaključkom poslodavci dovode u još teži položaj jer je napravljena razlika između rada ugošteljskih objekata na otvorenom i u zatvorenom prostoru.

S ciljem efikasnijeg saniranja negativnih posljedica pandemije, poštujući sve propisane epidemiološke mjere, Udruženje poslodavaca Kantona Sarajevo uputilo je dopis Vladi KS u kojem se predlaže da se izjednači radno vrijeme ugošteljskih subjekata otvorenog i zatvorenog tipa, odnosno da radno vrijeme ovih subjekata bude do 21:00 sati.

UPKS uputilo zahtjev za usklađivanje Zakona o komunalnim djelatnostima i Odluke Vlade KS o cijeni komunalnih usluga iz segmenta zajedničke komunalne potrošnje


Udruženje poslodavaca Kantona Sarajevo obratilo se Ministarstvu komunalne privrede, infrastrukture, prostornog uređenja, građenja i zaštite okoliša KS sa zahtjevom za usklađivanjem Zakona o komunalnim djelatnostima i Odluke Vlade KS o cijeni komunalnih usluga iz segmenta zajedničke komunalne potrošnje.



Udruženje je podsjetilo ministra Hadžiahmetovića da je Vlada Kantona Sarajevo 21.02.2020. godine donijela Odluku o cijeni komunalnih usluga iz segmenta zajedničke komunalne potrošnje kojom se utvrđuje cijena komunalne usluge za poslove koje obavljaju kantonalna javna komunalna poduzeća. Odlukom je definirano da se

pravnim licima usluge obračuna i fakturiranja vrše prema zapremini stvarno odvezenog otpada, umjesto prema kvadratnom metru korisne izgrađene površine. Međutim, Odluka se u praksi ne provodi.

Obzirom da je važeći metod obračuna odvoza komunalnog otpada praktično parafiskalni namet, iz Udruženje poslodavaca KS smatraju da bi se promjenom metodologije obračuna pomoglo privrednim subjektima u periodu izuzetno otežanog poslovanja uslijed pandemije, te je zatražen hitan sastanak radi upoznavanja sa budućim aktivnostima Ministarstva i Vlade KS na provođenju ove odluke.



UPKS traži refundiranje naknade plaće i doprinosa za vrijeme bolovanja i izolacije izazvane virusom Covida-19

Udruženje poslodavaca Kantona Sarajevo uputilo je premijeru Vlade KS Edinu Forti zahtjev za refundiranje naknade plaće i doprinosa radnika za vrijeme bolovanja i izolacije izazvane virusom Covida-19. U dopisu se napominje da pandemija koronavirusa u BiH traje već godinu, te da je u Kantonu Sarajevo registrovano skoro 50.000 zaraženih osoba, a da ne postoji podatak o broju osoba kojima je izdato rješenje o izolaciji. Iz

navedenih podataka nije moguće doći do zvanične statistike o broju zaraženih osoba i izoliranih zbog simptoma Covida-19 koji se nalaze u radnom odnosu. Procijene poslodavaca su da je više od 15 posto uposlenih bilo zaraženo ili bilo prisiljeno biti u izolaciji od minimalno 14 dana što dovodi do zaključka da su poslodavci trpjeli značajne gubitke zbog enormnog povećanja broja dana bolovanja njihovih radnika.

Gubitci poslodavaca izazvani korona virusom, odnosno enormnim povećanjem bolovanja, najviše se ogledaju u sljedećem:

- Isplata plaće i doprinosa u 100 posto iznosu za uposlenike koji su oboljeli ili su bili u kontaktu sa osobom pozitivnom na korona virus,
- Dodatno angažiranje i isplata plaće i doprinosa radnicima koji su preuzeli poslove oboljelih radnika radi nesmetanog odvijanja radnog procesa.

Refundacija naknade plaće radnika za vrijeme bolovanja, odnosno zakonski minimum utvrđen je u članu 47. Zakona o zdravstvenom osiguranju FBiH, prema kome naknada plaće za vrijeme bolovanja ne može biti manja od 80 posto osnovice za naknadu, a osnovica ne može biti niža od iznosa minimalne plaće važeće za mjesec za koji se utvrđuje naknada. Dakle, iznos naknade plaće za vrijeme bolovanja utvrđuje se internim aktom poslodavca, s tim da u tom internom aktu ne smije biti utvrđeno manje pravo od onog utvrđenog Zakonom.

Pravilnikom o naknadi plaće za vrijeme privremene spriječenosti za rad na teret sredstava Zavoda zdravstvenog osiguranja KS propisana je visina naknade plaće koja se isplaćuje na teret kantonalnog zavoda zdravstvenog osiguranja. U članu 8. Pravilnika propisano je da najviši iznos ovakve naknade plaće ne može biti viši od 80 posto osnovice koju čini prosjek iznosa isplaćenih plaća osiguranika na koju je obračunavan i uplaćivan doprinos za obavezno zdravstveno osiguranje u posljednjih šest mjeseci prije nastupanja privremene spriječenosti za rad, ne uzimajući u obzir mjesec koji prethodi mjesecu u kome je nastupila privremena spriječenost za rad osiguranika. S tim što najviši iznos plaće koji se isplaćuje na teret sredstava Zavoda, u skladu sa ovim Pravilnikom, ne može biti viši od 80 posto od prosječne neto plaće ostvarene u FBiH prema posljednjem objavljenom podatku Federalnog zavoda za statistiku.



U vrijeme kada su mnoge kompanije pogođene pandemijom COVID-19, bilježe gubitke iz redovnog poslovanja i suočavaju se sa nedostatkom prihoda, nameće se kao goruće pitanje isplata naknada za vrijeme trajanja bolovanja uzrokovana Covid-19 sa osnovicom koja je definirana gore navedenim zakonskim propisima.

Zbog navedenog, a u cilju pomoći i podrške privrednim subjektima u realnom sektoru, Udruženje poslodavaca KS smatra da nadležni organi odnosno Vlada Kantona Sarajevo, treba donijeti sljedeće odluke:

- Refundacije naknade plaće radnika za vrijeme bolovanja i izolacije izazvane virusom COVID-19 isplaćuje se u 100 posto iznosu osnovice koju čini prosjek iznosa isplaćenih plaća osiguranika na koju je obračunavan i uplaćivan doprinos za obavezno zdravstveno osiguranje u posljednjih šest mjeseci prije nastupanja privremene spriječenosti za rad, a ne viši od prosječne neto plaće ostvarene u FBiH prema posljednjem objavljenom podatku Federalnog zavoda za statistiku
- Refundacija u 100 postotno iznosu isplaćenih doprinosa na plaću osiguranika za vrijeme bolovanja.

UPKS uputilo zahtjev za sastanak premijeru Vlade KS

S obzirom na probleme izazvane pandemijom koronavirusa i negativnim ekonomskim posljedicama, sa kojima se susreće cjelokupno društvo, pa tako i realni sektor, Udruženje poslodavaca Kantona Sarajevo obratilo se premijeru Vlade KS Edinu Forti sa zahtjevom za sastanak.

Na sastanku bi se razgovaralo o stanju privrede i teškoćama s kojima se poslodavci trenutno susreću, planu mjera Vlade KS kojima bi se ublažile negativne posljedice pandemije koronavirusa i potrebi za kompletiranje saziva Ekonomsko-socijalnog vijeća KS i održavanja hitne sjednice.

Stupila na snagu Uredba o postupku finansiranja cijele ili dijela minimalne mjesečne neto plaće za mjesec u 2021. godini

U Službenim novinama KS 16/21 od 22.04.2021. godine objavljena je [Uredba o postupku finansiranja cijele ili dijela minimalne mjesečne neto plaće \(u FBiH\) za mjesec u 2021. godini.](#)

Uredbom se uređuje donošenje odluke o odobravanju finansiranja cijele ili dijela minimalne mjesečne neto plaće za odnosni mjesec u 2021. godini, raspisivanje javnog poziva, prijava na javni poziv, pregled prijave i dokumentacije, subjekti koji su isključeni iz finansiranja, uslovi za ostvarivanje prava na uplatu, maksimalni iznos minimalne mjesečne neto plaće koji se može uplatiti, donošenje odluke o utvrđivanju iznosa dijela minimalne mjesečne neto plaće za uplatu, donošenje odluke o odobravanju i uplati sredstava za finansiranje dijela minimalne mjesečne neto plaće, objava listi poslovnih subjekata i pravna zaštita poslovnih subjekata koji su se prijavili na javni poziv. Uredba je donijeta na insistiranje Udruženja poslodavaca KS. Uredbom je propisano da Vlada Kantona Sarajevo na prijedlog Ministarstva privrede KS donosi pojedinačnu odluku kojom se odobrava finansiranje cijele ili dijela minimalne mjesečne neto plaće (u FBiH) za odnosni mjesec u 2021. godini.

Na sjednici UO UPKS definisane teme sastanka sa predstavnicima Vlade KS

Na sjednici Upravnog odbora Udruženja poslodavca Kantona Sarajevo, održanoj 28. aprila 2021. godine, članovi su delegirali teme o kojima će se razgovarati na sastanku sa predstavnicima Vlade KS, a koji je dogovoren za 30. april.

Usvojen je zaključak kojim su definisane teme ključne za privredu Kantona Sarajevo, i to:


- Uspostava saradnje i komunikacije Vlade, ministarstava i poslodavaca
- Prijedlog mjera za pomoć ugroženim djelatnostima
- Pitanja vezana za rad Savjetodavnog tijelo za ekonomiju Vlade KS
- Stimulacija za nova zapošljavanje radnika
- Poticaji u nova proizvodna investiranja
- Naknada za bolovanje u vrijeme Covid-19
- Odluka o cijeni odvoza otpada
- Parafiskalni nameti
- Depolitizacija javnih preduzeća
- Upravni/Nadzorni odbori u Javnim preduzećima i institucijama KS
- Javno privatno partnerstvo
- Zakon o ESV KS

Udruženje poslodavaca KS će na sastanku s Vladom KS predstavljati Safudin Čengiđ, Vesna Beganović, Suad Ećo, Salih Lemeš i Nijaz Skenderagić.

U pripremi za IV vanrednu sjednicu Ekonomsko-socijalnog vijeća za područje Kantona Sarajevo na kojoj će se razmatrati Nacrt uredbe o postupku prijema u radni odnos u javnom sektoru na području Kantona Sarajevo, UO je nakon razmatranja Uredbe donio zaključak da predstavnici Udruženja poslodavaca KS u Ekonomsko-socijalnom vijeću ne mogu podržati Nacrt uredbe čiji tekst u mnogome nije precizan i koja će povećati troškove javnog sektora.

Prezentacija unapređenje privrednog pravosuđa u BiH u uslovima krize COVID-19

Projekat tehničke pomoći za unapređenje poslovne klime kroz brže rješavanje privrednih predmeta u Bosni i Hercegovini pruža podršku pravosudnim institucijama u BiH da implementiraju reforme koje će poboljšati efikasnost i pristup privrednom pravosuđu. Projekat implementira Svjetska banka uz finansijsku podršku Vlade Velike Britanije, a u sklopu projekta sačinjena je i prezentirana analiza o privrednom pravosuđu u uslovima krize Covida-19. Prezentaciji je prisustvovala sekretar UPFBiH Mersiha Jusić.



Sudovi nisu mogli održavati ročišta koja su zahtijevala okupljanje većeg broja ljudi u jednoj prostoriji. Kao rezultat toga, većina velikih stečajnih predmeta nije mogla biti procesuirana.



Ročišta u velikim stečajnim postupcima pred Općinskim sudom u Tuzli na čekanju zbog krize COVID-19


6 velikih stečajnih postupaka od kojih svaki uključuje preko **100 povjerilaca** čeka na rješavanje

Oko **80%** povjerilaca su radnici koji potražuju izgubljene plate

Ukupna potraživanja povjerilaca iznose preko **40 miliona EUR**

U analizi se navodi da je, zbog strogih mjera za suzbijanje širenja virusa poput lockdowna, opao broj kako novih privrednih predmeta koje su zaprimili prvostepeni sudovi u BiH, tako i broj riješenih predmeta. Kao rezultat toga, zaostatak je ostao relativno stabilan. Sudovi nisu mogli održavati ročišta koja su zahtijevala okupljanje većeg broja ljudi u jednoj prostoriji. Kao rezultat toga, većina velikih stečajnih predmeta nije mogla biti procesuirana.

Istaknuto je da su najveći izazovi za sudove u BiH u odgovoru na krizu COVID-19 nedovoljno razvijeni zakonodavni okvir i infrastruktura za e-identifikaciju i e-usluge te da se očekuje, ukoliko kriza potraje, da će se broj novih privrednih predmeta povećati u 2021. godini, što će biti rezultat usporavanja u rješavanju predmeta u 2020. godini i povećanog broja privrednih



sporova koje je prouzrokovala kriza, kao što su sporovi koji se odnose na radna ili stečajna pitanja.


Kako bi sudovi ublažili ove rizike, preporučeno je organizovanje radno opterećenje sudova korištenjem najažurnijih statističkih informacija koje proizvodi CMS, uvođenje mjere za smanjenje zaostatka u Općinskom sudu u Sarajevu poput ustupanja dijela neriješenih predmeta drugim sudovima, unapređenje poslovnih procesa u svim sudovima, odnosno uvođenje rada u smjenama, izrada općih smjernice koje će usmjeravati proces upravljanja krizom, te osiguranje programa specijalizirane obuke za sudije, na primjer o stečajnim postupcima i postupcima likvidacije.

Istaknuto je da je čak 92 posto privrednih subjekata koje je anketirao tim Svjetske banke navelo da njihovi zaposlenici koriste elektronsku poštu i elektronski procesuiraju dokumente, te da su spremni na komunikaciju na daljinu.

U cilju omogućavanja e-komunikacije sa sudovima potrebno je unaprijediti CMS tako da bude interaktivan alat za e-komunikaciju između stranaka i suda, uskladiti regulatorni okvir o e-uslugama i e-identifikaciji sa zakonodavstvom EU-a, izgraditi neophodnu fizičku infrastrukturu za e-identifikaciju i e-usluge, unaprijediti procesna pravila koja uređuju prihvatljive oblike e-identifikacije u komunikaciji sa sudovima, unaprijediti modalitete razmjene informacija na daljinu

U prezentaciji je također naglašeno da je potrebno, u cilju ubrzavanja rješavanja određenih vrsta predmeta, izmijeniti i dopuniti zakone o parničnom postupku radi uvođenja dokumentarnog kolosijeka koji omogućava razmatranje isključivo u pisanom obliku nekih vrsta predmeta i online kolosijeka koji sudijama omogućava održavanje ročišta u nekim građanskim i privrednim predmetima putem videokonferencija.

Predstavnice UPFBiH prisustvovala prezentaciji o učešću u konsultacijama putem web platforme eKonsultacije i Etičkog kodeksa za organizacije civilnog društva



Predstavnice Udruženja poslodavaca FBiH Mersiha Jusić i Jasmina Kurspahić prisustvovala su danas online prezentaciji o učešću u konsultacijama putem web platforme eKonsultacije i prezentaciji Etičkog kodeksa za organizacije civilnog društva (OCD) u Bosni i Hercegovini.

Cilj prezentacije bio je da se zainteresovani građani i predstavnici civilnog društva upoznaju sa web platformom <https://ekonsultacije.gov.ba> te dobiju jasna uputstva na koji način je mogu koristiti.

Platforma omogućava potpuno i pravovremeno informisanje o procesu donošenja pravnih akata na nivou Vijeća ministara BiH, te osigurava pouzdan komunikacijski kanal za aktivno učešće u kreiranju javnih politika. U drugom dijelu prezentacije predstavljen je Etički kodeks za organizacije civilnog društva kao skup normi, principa i vrijednosti utvrđenih sa ciljem standardizacije njihovog ponašanja i djelovanja. Prezentirani principi i vrijednosti podrazumijevaju dobrobit za grupe ljudi ili društvo u cjelini, odnosno prvenstveno je usmjeren na poštovanje javnog interesa kao ambijenta u kojem djeluju OCD.

Nova članica UPFBiH - Latex d.o.o.

LATEX d.o.o. je osnovan 2001.godine kao privatno preduzeće sa sjedištem u Cazinu i osnovnom djelatnošću uvoz i distribucija medicinskog potrošnog materijala brenda Romed® iz Holandije.



Generalni je zastupnik firme VAN OOSTVEEN MEDICAL iz Holandije koja postoji još od 1986.

godine i bavi se proizvodnjom medicinskog potrošnog materijala, sterilnih resorbirajućih i neresorbirajućih hirurških materijala. Svi proizvodi su proizvedeni u skladu sa europskim i međunarodnim normama. U asortimanu možete naći razne proizvode koji se koriste u poljima medicine, stomatologije i industrije. Više o kompaniji pročitajte [OVDJE](#).

Nova članica UPFBiH - Sarajevostan d.o.o.



Sarajevostan d.o.o. je privredno društvo osnovano prije više od 50 godina, te je u ovoj djelatnosti kompanija sa najvećim iskustvom. Za sve ove godine poslovanja, Sarajevostan d.o.o. se transformirao u savremeno organizovanu, dobro opremljenu kompaniju, profilisanu za tržišno poslovanje. Obzirom na resurse kojim raspolaže, organizaciju i proizvodno iskustvo, Sarajevostan d.o.o. je vodeći certificirani upravnik u KS i Bosni i

Hercegovini. Sarajevostan d.o.o. pruža usluge upravljanja stambenim zajednicama u skladu sa Zakonom o upravljanju zajedničkim dijelovima zgrade koje podrazumijevaju administrativno i finansijsko vođenje zgrade, tehničko održavanje, primjenu mjera energetske efikasnosti, zaštitu životne sredine i stvaranje uvjeta za sigurno stanovanje.

Više o Sarajevostanu pročitajte [OVDJE](#).